

Uunga siunnersuut: Inatsisartunut qinersisarneq pillugu Inatsisartut inatsisaat nr. xx, xx. xxx 2020-imeersoq
(Naalakkersuisut Siulittaasuat)

Saqqummiussissut
(Naalakkersuisut Siulittaasuat)

Siullermeerneqarnera

Inatsisartunut qinersisarneq pillugu Inatsisartut inatsisissaannut siunnersuut matumuuna Naalakkersuisut sinnerlugit saqqummiutissavara.

Inatsisissatut siunnersuummi nutaaliorderit annertunerpaartaat tassaavoq, internetsikkut qarasaasiatigut allakkatigut taasinissamut periarfissamik atuutsitsilerneq. Tamatuma qinersinerup ingerlasarnerata digitalinngorsarneqarnera annertunerulersissavaa, tamannalu digitalinngorsaanermut periusissiamut atuuttumut naapertuuppoq.

Qinersisarneq pillugu inatsit atuuttoq tassaavoq Kalaallit Nunaanni Inatsisartunut qinersisarneq pillugu Inatsisartut inatsisaat nr. 9, 31. oktober 1996-imeersoq. 1996-ip kingorna inatsit pingasoriarluni allanngortinneqartarsimavoq.

Qinersisarneq pillugu inatsisissamut nutaamut siunnersuummi inatsisip oqaasertaasa nutaamik aaqjissuunneqarlutik, oqaatsit nutarterneqarlutik, taaguusersuutit naleqqussarneqarlutik, nassuiaatit annertusarneqarlutik kiisalu qarasaasiakkut allakkatigut taasinissamut periarfissamik atuutsitsisoqalerluni, nutarterinissap qulakkeernissaa sammineqarpoq.

Qinersisarneq pillugu inatsisissaq qinersisartunut, maannakkut aalajangersakkat atuunneranni taasisinnaanissaminnik ajornakusoortitsillutik misigisaqartartunut, pitsaanagerusunik periarfissaqalersitsinissaq siunnerfigineqarpoq. Qinersisartut sapinngisamik amerlanerpaat taasinissaminnut periarfissaqassapput.

Inatsisissatut siunnersuummi nutaaliorderit ataasiakkaat pingaernerpaat tassaapput:

Inatsisartunut qinersisinnaatitaaneq

Nutaaliorderit siunnersuutigineqarpoq, inuit assersuutigalugu Kalaallit Nunaata avataani ilinniartut, nunami allamiikkallarnerminnut tunngaviusut atorunnaareernerisa kingorna qaammatit 6-it qaangiutsinnagit Kalaallit Nunaannut utersimagunik, qinersisinnaatitaanertik attatiinnartassagaat. Inuit Kalaallit Nunaata avataaniikkallartut, assersuutigalugu ilinniartut, ilinniareernerminni Kalaallit Nunaannut uternermik kinguinngua qinersinissaq nalunaarutigineqarpat, qinersisinnaatitaanermik annaanissaata pinngitsoortinnissaa, siunnersuuteqarnerminni Naalakkersuisut kissaatigaat.

Qinersinermut ataatsimiititaliap katitigaanera

Qinersinermut ataatsimiititaliap katitigaanera allanngortinneqassasoq siunnersuutigineqarpoq, taamaalilluni Qinersinermut ataatsimiititaliami siunnessami ilaasortaassallutik Naalakkersuisut Siulittaasuata Naalakkersuisoqarfiani naalakkersuisoqarfimmut pisortaaneq siulittaasutut, Naalakkersuisuni inatsisilerinermut pisortaq, ilaasortaq ataaseq kommunit ataatsimoorlutik

toqqagaat kiisalu biskoppi, imaluunniit ilaasortat sisamat taakkua sinniisussai. Qinersinermut ataatsimiititaliap aamma Naalakkersuisuni inatsisilerinermut pisortaq ilaatilerlugu annertusitineqarneranut tunngavilersuutigineqarpoq, Qinersinermut ataatsimiititaliap inatsisilerinikkut piginnaasaqarfiisa nukittorsarneqarnissaannik kissaateqarneq.

Qinersinermik siulersuisut katitigaanerat

Siunnersuutigineqarpoq qinersinermik siulersuisut katitigaanerat allangortinneqassasoq, taamaalilluni qinersinermik siulersuisuni siunissami ilaasortaassallutik borgmesteri kiisalu kommunalbestyrelsimi ilaasortat marluk, d'Hondtip qassinik qinerneqarsimaneq tunngavigalugu inissat agguataarneqartarnerannik periaasia atorlugu qassinik qinerneqarsimaneq tunngavigalugu kommunalbestyrelsimit toqqarneqartut.

Partiit Inatsisartunut qinersinermut qinigassanngortissinnaatitaanerat

Nutaaliornermut qitiutillugu siunnersuutigineqarpoq, partii kingullermik qinersinermi Inatsisartuni ilaasortaataitaqarsimaguni, ingerlaannaq Inatsisartunut qinigassanngortissinnaatitaassasoq. Partii qinersinissamik nalunaaruteqarnermi Inatsisartuni ilaasortaataitaqassasoq piunasaqaat atorunnaassasoq, taamaalilluni siunnersuutigineqarpoq.

Qinigassanngortittut tamarmik partiimit nalunaarutigineqarneranni, partiip qinigassanngortitaannut nalunaarsuiffik partiimi, partiip malittarisassai malillugit Inatsisartunut qinersinissamut qinigassanngortittussanik akuersissuteqartumi, oqartussamit atsiorneqarsimassasoq, suli piunasaqaataavoq.

Partiit mikisut qinersinermi isertut, kisianni ilaasortat qinerneqartut piffissami qinersiviusumi partiimut allamut nuunnerannik misigisaqartut, tullianik qinersinermi qinigassanngortissinnaatitaanissamut periarfissarissaarnerulernissaasa qulakkeerneratigut, oqartussaaqatigiilluni sulinerup ingerlanerata nukittorsarneqarnissaa, Naalakkersuisut siunnersuuteqarnerminni kissaatigaat.

Sioqutsisumik taasinermut taaguusersuutiniq allangortitsineq

Inatsisissatut siunnersuummi taaguusersuutit nunani tamalaani malitassanut naapertuuttunngortinneqarput. Tamatuma kingunerisaanik oqaaseq allakkatigut taasineq, maannamut atorneqarsimasoq, oqaatsimik sioqutsisumik taasinermik taarserneqarpoq. Tamanna internetikkut qarasaasiatigut allakkatigut taasinissamik periarfissamik atuutsitsilernermet ataqatigiissillugu isigineqassaaq.

Qarasaasiatigut allakkatigut taasineq

Nutaaliornermut qitiutillugu siunnersuutigineqarpoq, allakkatigut taasineq qarasaasiatigut pisinnaasoq aammalu qarasaasiatigut kisitsisoqarsinnaasoq, Naalakkersuisut aalajangiisinaanissaannut periarfissamik atuutsitsisoqalissasoq. Qarasaasiatigut allakkatigut taasineq naammaginartumik ingerlanneqarsimanersoq nalilersornissaa siunertaralugu, aqqissuussineq naliliiffigineqassasoq Naalakkersuisut aalajangersinnaagaat, tamatumunnga nangissutigalugu siunnersuutigineqarpoq.

Qarasaasiatigut allakkatigut taasisinnaanissamut periarfissaqarnissaanik siunnersuut arlalitsigut tunngaviusumik isumaliutersuuteqarnissamut pissutissaqalersitsisimavoq. Isumaliutersuutit pingaarnersai matumani oqaatigineqassapput:

a. Isertuussineq

Qinersisartut ataasiakkaat taasinerisa isertuunneqarnissaasa qulakkeernissaanut akisussaaffik, aamma qinersisartut ataasiakkaat akisussaaffigissagaat, qinersisarnermut inatsimmi nutaami siunnerfigineqarpoq. Tamanna inatsisinut atuuttunut sanilliullugu allangortitsineruvoq, tassanimi qinersisartut ataasiakkaat taasinerannik isertuussinissamik qulakkeerinissamut akisussaaffik taamaallaat oqartussaniimmat. Allangortitsinermi suliasaqarfimmi danskit isummertarnerat atorunnaarneqassasoq siunnerfigineqarpoq. Tamatumunnga taarsiullugu Kalaallit Nunaat suliasaqarfimmi isummertarnermut Norgemi, Sverigemi aamma Finlandimi atuuttumut, assingusumut inissittussanngusaaq.

b. Atoruminassuseq

Qinersisartut qinersinermut avatangiisini nakkutigisaanngitsuni taasisinnaanerannik ammaanermi, taasinissamut periarfissat tassanngaannaq atoruminarnerujussuanngussapput. Tamannalu atuisinnaalersitsinerulernissaq, qinersisartut siunissami internetikkut qarasaasiakkut allakkatigut taasisinnaalersinneqarnissaannut Naalakkersuisut siunertaraat.

c. Qarasaasiatigut allakkatigut taasisinnaalernerup iluaqutissartai

Qarasaasiatigut allakkatigut taasisalernerup iluaqutissartai Naalakkersuisut naatsorsuutiginerusaat tassaapput:

Qarasaasiatigut allakkatigut taasisalernikkut imarsiortut inuillu Kalaallit Nunaata avataaniikkallartut qinersinermut peqataanissamut pitsaanagerusunik periarfissaqalissapput. Imarsiortut qineqqusaarneq tamarluinnaat imaaniissinnaasarput. Taamaallit tikigussaasumik sioqqutsisumik taasinikkut taaseqataasinnaanissaminnut ullumikkut periarfissaqarneq ajorput.

Taamaaqataaniq inuit Kalaallit Nunaata avataaniikkallartut, assersuutigalugu ilinniartut, misigisarsimavaat sioqqutsisumik taasinitik tikigussaasut tamatigut taasiartorfissamut sioqqutsisumik taasinerit tikigussaasut ilanngullugit naatsorsorneqarfissaraluannut anngunneq ajortut.

Qinersisartut taakkua qarasaasiatigut allakkatigut taasinissamik periarfissaqalernerneq immikkut atorluarsinnaalissavaat.

d. Sioqqutsisumik taasinernik tikigussaasunik aamma qarasaasiatigut allakkatigut taasinernik kisitsinerit qitiusumut inissinneqarnerat

Siunnersuutigineqarpoq sioqqutsisumik taasinerit tikigussaasut qitiusumut inissinneqarsinnaasut aammalu qarasaasiatigut allakkatigut taasinerit ilanngullugit qitiusumi kisinneqarsinnaasut, Naalakkersuisut aalajangersinnaagaat. Sioqqutsisumik taasinernik tikigussaasunik kisitsinerit qitiusumut inissinneqarnissaat, aatsaat qarasaasiatigut allakkatigut taasinissaq ajornarunnaarpat, pisariaqalertussaavoq.

Qitiusumut inissinissaq pisariaqarpoq, tassami taasinernik kisitsinerimi sioqqutsisumik taasinernik tikigussaasunik kisitsineq aammalu qarasaasiatigut allakkatigut taasinernik kisitsineq ataqatigiissaarneqartussaammata. Ataqatigiissaarinerneq taanna teknikimik isumannaallisaanermillu pissuteqartumik sumiiffinni taasivinni ataasiakkaani inissinneqarsinnaanngilaq.

Qarasaasiatigut allakkatigut taasinernik suliarinninnissamut IT atorlugu periaaseq pilersinneqareerpat, internetikkut qarasaasiatigut allakkatigut taasinissamut periarfissaq,

aatsaat Naalackersuisunit atorsinnaalersinneqassaaq. Naatsorsuutigineqarpoq IT atorlugu periaaseq taamaattoq 2022-ip ingerlanerani piareersimalersinnaassasoq.

e. Ileqquusumik ulloq qinersivissaq allanngorsinnaavoq

Qarasaasiatigut allakkatigut taasinissamut periarfissamik ammaanermi unammilligassaq siunissami tassaasinnaavoq, ukiut ingerlaneranni amerlasuut qarasaasiatigut allakkatigut taasisariaqartassappata, ulloq qinersiviusoq sumiiffinnut taasiviusussanut amerlasuut aggerlutik taasisarlutik ullumikkut ileqqoqarnitta allanngoriartuaartussaanaera.

Aningaasaqarneq

Qarasaasiatigut taasinissamut periarfissamik atuutsitsilernermet tungaviusoq aallaaviatigut tassaangilaq sunniteqarluarnerulersitsinissamik imaluunniit sipaaruteqarnissamik kissaateqarneq. Tunngaviusoq tassaavoq 'inuiaqatigiit oqartussaaqatigiittut' nukittorsarneqarnissaannik kissaateqarneq.

Qarasaasiatigut allakkatigut taasisinnaalernerup atuutsinneqalernerani IT atorlugu periaatsip qarasaasiatigut allakkatigut taasinernik passussiviusussap ineriartortinneqarneranut atuutsinneqalerneranullu atatillugu arlalinnik aningaasartuuteqartoqarnissaa naatsorsuutigineqarpoq. IT atorlugu periaatsimik ineriartortitsinermet atuutsitsilernernullu aningaasartuutit siunissami 2 millioner koruuninik annertussuseqassasut missingersorneqarpoq. IT atorlugu periaatsimik ineriartortitsinermet atuutsitsilernernullu aningaasartuutit ilai kontunit pioreersunit aaneqarsinnaassapput. PDA (Pisortat Digitalinngorsaanermik Aqutsisoqatigiivi) (siusinnerusukku FOIS) periaatsimut nutaamut neqeroortitsinermet najoqqutassanik suliaqarnissamut 2020-mut 400.000 koruuninik aningaasaliivoq.

Tamatuma saniatigut IT atorlugu periaatsimik, qarasaasiatigut allakkatigut taasinernik passussiviusussamik, ineriartortitsinermet atuutsitsilernernullu 2021-mut aningaasanut inatsisissamut siunnersuummi immikkut aningaasaliissutinik 1,5 mio. koruuninik ilanngussinissaq pingaarnersiunermeti salliutinneqassasoq Naalackersuisut naatsorsuutigaaq.

IT atorlugu periaatsimik nutaamik ineriartortitsinerup, atuutsitsilernerup ingerlatsinerullu kiisalu qarasaasiatigut allakkatigut taasinernik aqunneqarnerannut passunneqarnerannullu allaffissornikkut atugassaqalersitsinissaq, 2020-mut aningaasanut inatsimmi qulakkeerneqarpoq.

Naalackersuisut aammattaaq inatsisissatut siunnersuut tassungalu nassuiaatit innersuussutigissavaat.

Taamatut oqaaseqarlunga siunnersuut Inatsisartunut kajumittumik suliaassanngortippara.